

TE HUKUURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 2.

Febuare 1929.

Mat. 23.

E oia mau atoa teie ta'u e faaite ia outou, i faataa-e-hia te tahi atu a mau opu ra ia ratou; e no ta ratou parau ino, aore ratou i ite ia ratou. E oia mau ta'u e parau atu ia outou, no outou ta'u parau ra, a na o atu ai au e, E mamoe e atu a ta'u, e ere i to teie nei aua, e aratai atoa mai au ia ratou e tia'i, e faaroo mai hoi ratou i to'u re'o, ia hoe a'e nana, e hoe hoi tia'i. (B. a M. III Nephi 15:20-21)

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo" tei papaihia e Tamate Aposetolo; Faaauhia ei reo Tahiti e Elita.

HIRO'A FAAROO 8. * * * *E te faaroo atoa nei hoi matou e, e te Buka a Moromona ra, o te parau mau ia a te Atua.*

(E tuatiraa teie nei parau.)

UIRAA 2. O VAI na nunaa rahi e piti i parauhia i roto i te Buka a Moromona?

P. Te Ati Nephi e te Ati Iareda.

Parau Tanturu: Ua papaihia te rahiraa o te Buka a Moromona no te Ati Nephi. Ua faarue Lehi e to'na utua-fare, mai i te oire ra i Ierusalema i te matahiti 600 na

mua i te Mesia, haere atura ratou e te utuafare atoa no Isemaela i roto i te medebara na pihaiho i te Miti Uteute e tae atu ai ratou i te moana rahi, i reira ratou i hamani ai i te hoé pahi haere atura tapae ihora i te pae no te tooâ o te râ i te fenua ra e parauhia nei Amerika Apatoa. I muri iti aé ua faataahia taua feia ra i roto i na nunaa e piti oia hoi te Ati Nephi o tei pee ia Nephi o tei maitihia ei aratai no ratou; e te tahi pae ua pee ratou ia Lamana te matahiapo no te utuafare o Lehi, e ua parauhia ratou i te Ati Lamana.

Te tamaí noa ra ratou te tahi pae i te tahi e tae noa'tu i te taime i haamou-roa-hia'i te Ati Nephi. E o Moroni ia te taata hopea no ratou, e na'na te hopea o te Buka a Moromona i papai, e ua hunahia'tura te reira i roto i te aivi i parauhia Cumora i te 400 o te matahiti na muri aé i te Mesia.

Te tahi nunaa i parauhia i roto i te Buka a Moromona, oia hoi te Ati Iareda, ua faarue ratou i te pare ra o Babela i te tau i faahuru-ê-hia'i te reó o te mau taata, e ua haere maira ratou i te fenua Amerika. I reira to ratou nohoraa e tae noa'tu i te taime i pee ai ratou i te ino e i reira ua pau roa ratou i te hoé tamaí rahi roa. Te ora ra râ te hoé anaé taata no ratou e ua farerei oia i te Ati Muleka.

O te Ati Muleka ia te hoé tiaa taata tei faarue Ierusalem e hoé ahuru ma hoé matahiti na muri mai i to Lehi revaraa mai, tapae atura ratou i Amerika. No to ratou máua e to ratou mau peu ino na riro ratou ei feia poiri, area râ ua itea ratou e to te Ati Nephi e ua amui atura ratou i rotapu i te Ati Nephi ra.

Uiraa 3. Eaha te huru o te mau api tei horoahia ia Iosepha Semita?

P. Ua na ô maira te parau e, ua hamanihia taua mau api ra i te auro, e hitu initi i te aano, e e vaú initi i te roa, e to ratou meumen mai te hoé punu fare rairai roa ia. Ua taatihia ratou i na tapea e toru; e ia taatihia taua mau api

ra ua riro ia ei buka auro fatata i te ono initi i te meumeu. Ua ootihia te mau parau papairaa huru ê roa i na pae e piti no taua mau parau api ra.

Parau Tauturu: E toru huru api i faaitehia i roto i te parau papai i nia i te api matamua, oia hoi:--

1- Te mau api a Nephi, e piti huru no taua mau api ra, oia hoi te mau api rahi, e te mau api nainai.

2- Te mau api a Moromona, tei reira te parau haapotohia no te mau api a Nephi e te parau na Moromona raua Moroni i amuihia'tu i te reira.

3- Te mau api a Etera, oia hoite mau parau tuatapapa no te Ati Iareda.

Te vai atura te tahi huru api ê, oia hoi te mau api veo afaihia maira no roto mai ia Ierusalema. Oia ia te tuatapaparaa te tahi mau parau moá.

Ua parauhia te mau api matamua ra i te mau api a Nephi no te mea na'na te reira i haamata i te papai e ua horoahia'tura i roto i te rima no to'na mau mono e na ratou iho i papai i ta ratou ra parau i raro aé i to ratou iho mau i'oa. E piti huru api ta'na i papai, oia hoi te mau api rahi e te mau api nainai. Aita oia i ite i te tumu no taua na huru ra maori rá ua faauehia oia. 1 Nephi 9: 3.

I te hopea ua tae taua mau api ra i roto i te rima no Moromona e na'na te reira i haapoto. No reira ua fatata te huru i te reó e ati noa'é, no te mea na roto ia i te rima no te hoé taata.

I roto i to'na haapotoraa ua ite oia i te mau api nainai a Nephi mai te tau ratou i faarue ia Ierusalema e tae noa'tu i te tau no te arii ra o Beniamina. No te maramarama rahi to roto i te reira mau api, aita oia i haapoto i te reira, ua amuihia râ ratou i roto i te tahi parau haapotohia, mai to ratou papairaa mau i te matamua ra. No reira tei roto i te mau api i horoahia ia Iosepha Semita i na huru api a Nephi e

piti, oia hoi te parau i haapotohia e te mau api nainai.

Uiraa 4. Eaha i papaihia'i taua na huru api ra?

P. A oti ai te tahi pae no te mau api i te iritihia e Iosepha Semita ua faatia oia ia rave Maratini Harita i te reira e ua topa'tura te reira i roto i te rima no to'na ra mau enemi. Te opua ra ratou i te tia i e tae noa'tu i te taime e iritifaahou-hia'i taua mau api ra ei reira te manaó ra ratou e tuu atu ia ratou i te mau api ta ratou i faahuru ê mai te parau i te mau taata e, a hió i teie taata haavare e, aita e nehenehe ia'na ia iriti mai i te parau-tia no te mea ua huru ê te iritiraa i teie nei e to'na iritiraa matamua ra.

Aita râ ratou i manuia i te reira opuaraa no te mea ua faaite maira te Atua ia Iosepha i te ravea e faaorehia'i te reira. No reira ua iriti mai Iosepha i te parau no nia i te mau api nainai o tei faaite mai i te hoé â mau mea, areâ râ na Nephi iho te reira i papai e ere na Moromona o tei papai i te parau i eiâhia.

(Tuatihia teie nei parau.)

Ia ite i te maitai o te pure e ia farii oaoa i to'na maitai, te vai ra na mea e rave rahita tatou iho ia rave e tia'i. Ia hiópoa maite tatou i to tatou mau aau, ia mâ ratou i te hara e ia ineine tatou no te fariiraa i te mau haamaitairaa no ô mai i te ao ra. Aita e nehenehe ia tatou ia manaó e ô te Varua o te Atua i roto i te hiero viivii, oia hoi, te roro i te manaó ino e te aau o tei haamauruuru i te hinaaro tia ore.

Te na ô mai nei (Eugene Tunney) oia hoi, te taata o tei rê i nia aé ia Dempsey i roto i te motoraa no te champion o teie nei ao, "Aita e â vau i inu i te ava a aore râ puhipubi i te avaava.

Aita e â e mahana o tei ore i horoa mai i te taime ia rave tatou i te maitai o tei ore i ravehia na mua.

E Haere Tei Pohe I Hea?

TE FAREREI NOA NEI tatou i te ati no te pohe. I roto i te ao nei i te mau mahana atoa te oto noa nei te tahi mau taata no te mea ua taa ê ratou i to ratou mau here na roto i te poheraa. Na roto i te raveraahia o te hoé o to tatou mau hoa i te pohe ua faafariuhia to tatou mau manaó i to ratou hunaraa e i te huru o to ratou taоторaa i roto i te menema.

Te vai nei â te mau faaroo huru rau i nia i taua vahi ra. Te faaroo nei te hoé mau taata e, ia pohe te taata e hoí to'na varua i te Basileia o te Atua, e aore râ e haere roa i Hade e i reira e faaea'i e a muri noa'tu, te tino râ e pe noa i roto i te apoo. E te faaroo nei te tahi pae o te mau taata e, ia pohe te taata e taoto noa oia, oia hoi, to'na varua e to'na tino atoa i roto i te apoo e tae noa'tu i te poipoi no te tia-faahou-raa i te mahana hopea ra. E faaroo to te tahi mau taata e, ia pohe te taata o to'na ia hopea e aita ratou i faaroo i te tia-faahou-raa. Te faaroo atoa nei te tahi pae e, e uri taata te taata i te matamua e ia pohe oia e riro oia i te tabi atu mea mai te raau e aore râ te tahi atu animala teitei aé i te taata nei.

I to tatou iteraa'tu i taua mau huru haapiiraa o te taata nei ua tafifihia ia to tatou mau manaó i reira, e e manaó ihora tatou e, teihea te vahi e ite ai tatou i te huru mau o te poheraa. I roto i te mau haapiiraa o te taata anei? Aita no te mea e tauu noa te mau taata i to ratou mau manaó. I roto anei i to tatou tiai noa i te tau poheraa? Aita, no te mea, aita te taata i mauruuru ia tiai maoro oia i te hoé mea. Ua hinaaro oia ia ite i teie nei mahana. E mea nafea ra tatou i te ite atu i te reira ta tatou e imi nei? E te vai ra e hoé noa iho pahonoraa, e tera mai ia; ia imi tatou i te ite i roto i te mau haapiiraa o te Fatu e tia'i. Ua parau atura Iesu i te taata eiâ o tei faasataurohia i pihai'ho ia'na ra na ô

atura, "Ei paradaiso oe e o vau atoa i teie nei a mahana oia mau ta'u e parau atu ia oe nei." E i na mahana i muri mai ua parau maira Oia ia Maria na ô maira, "Eiaha e, tapea mai ia'u, aore â Vau i tae i nia i tau Metua ra."

Eaha ia te auraa o ta Iesu parau i na taime e piti. I te parau matamua ua faaite papu oia i taua taata eiâ ra ei paradaiso oe e o vau atoa i teie nei â mahana, area râ i na mahana i muri mai ua parau atura oia ia Maria, aore â vau i tae i nia i tau Matua ra. Aita Iesu i haavare i na taata ra, e no reira e ere paradaiso te Basileia te Atua.

Ua parau maira Petero i nia i taua vahi ra na ô maira; "O ta'na ia i aó atu i te mau varua e vai i roto i te tapearaa i teie nei; o tei ore i faaroo i mutaa ihora,* * *." (I Petero 3:19-20)

O paradaiso nei o te hoé ia faaeearaa no te mau varua atoa te maitai e te ino atoa hoi, area râ ua taa ê ratou i to ratou ibo mau pupu. Ua aóhia te evanelia ia ratou e Iesu Mesia, e ua tia ia tatou ia manaó e, te aó noa nei â to'na mau tavini i te evanelia i reira ia ratou o tei ore i faaroo i te evanelia a ora'i ratou i nia i te aó nei.

I roto i te Genese e ite tatou i teie nei parau, "O te matamehai teie o te raí e te fenua, i to ratou hamaniraahia, i te mahana i hamani ai te Atua ra o Iehova i te raí e te fenua ra, e te mau raau atoa o te fenua nei aore i nia iho i te fenua i reira, e te mau raau rii o te fenua nei aore i tupu* * *." (Genese 2:4-5) Ua hamani te Atua i te mau mea atoa i te pae varua hou ratou i tuuhia mai i nia i te ao nei. E hoí to tatou mau varua i reira i te vahi no reira mai ratou ra, e e faaea ratou i reira mai te raverave i te ohipa i haapaohia no ratou ra e tae noa'tu i te taime e tia faahou ratou ma to ratou mau tino i to'na huru matamua ra.

Ua parau maira te Atua, "Inaha na, o ta'u ohipa e to'u hanahana o te faatia ia i te tahuti ore e te ora mure ore o te taata. (Mose 1:39.)

Na Toma

Te Re'o Matamua

Ua tupu to tatou mau manaó i tera taime e i tera taime i nia i te reó matamua o to te ao nei, te reó o Adamu, e te reó o Enoha, e te reó o Noa. I taua mau taime ra e feruri iho â tatou e, te vai nei anei te reira reó i nia i te ao nei i teie anotau, e mai te mea te vai nei; o teihea ia reó? Te reó Farane anei, te reó Baritane anei, e aore râ te reó Tahiti anei? Te piti o to tatou feruriraa i nia iho i teie nei vahi: ua faaorehia anei te reó matamua e mai te mea e ua faaorehia, eaha te taime i faaorehia'i, e o vai te feia hopea i tei ite i te reira reó.

Mai te imiraa i roto i te mau buka moá a te Atua, ua ite tatou e, e hoé noa iho ia reó i nia i te ao nei i te haamataraa o te mau taata i te patu i te pare Babela ia tae ratou i nia i te raí. Riri ihora Iehova ia ratou no taua ohipa ra ta ratou i rave. I reira ua haapeapea e ua faahuru ê Iehova i to ratou reó, e ua haapurara oia ia ratou i nia i te fenua atoa e ati noa'é.

I te reira ihora taime i te paturaa o te pare Babela, ua parahi te hoé taata, o Iareda to'na i'oa e to'na taeae atoa i rotopu i te mau taata i tera vahi ra. E nau taata haamaitairahi-hia raua e te Fatu e ua haapao iho â raua i te mau faaueraa o te Atua. Ua parau atura Iareda i to'na taeae ia tiaoro atu i te Fatu ia ore Oia ia faahuru ê i to raua reó e te reó o to raua mau fetii, e te reó o to raua mau hoa. Ua tiaoro ihora te taeae o Iareda i te Fatu, e ua aroha mai te Fatu ia Iareda ma; no reira, aita'tura Oia i faâhuru ê i to ratou reó.

I muri rii aé i te reira ua parau faahou maira Iareda i to'na taeae i te ui atu i te Fatu, e tiavaru anei Oia ia ratou i rapae i te reira fenua, e mai te mea e, e na reira Oia, a ani atu ia'na i te hopoi ia ratau i te hoé fenua hau ê i te mau fenua o te ao nei i te maitai. Haapao ihora to Iareda taeae i ta Iareda parau. Ua faaite maira te Fatu ia ratou ia baa-

pao ratou i to'na mau faaueraa e tauturu Oia ia ratou i te hoé fenua maitai aé i te mau fenua atoa. Haapao ihora ratou e na roto i te haapaoraa i to'na mau faaueraa ua haaputuputu ratou i te huero o te mau huru raau atoa e te oni e te ufa i te mau huru puaa atoa, mai te huru o te ohipa i ravehia i te tau no Noa. Hamani ihora ratou i na pahi e vau, e ua tere atura ratou e ta ratou mau ohipa taatoa i te fenua Amerika i te pae apatoerau,

I taua fenua ra ua tupu ratou i te hoé nunaa rahi roa, area râ, aita iho â ratou i maoro i reira a haamata'i ratou i te rave i te mau peu au ore i mua i te aro o te Atua, mai te haamori idolo te huru. I te haamataraa o teie mau peu ino ua tupu atoa te mau tamaí e te mau peapea i rotopu ia ratou.

I te tahi mau tau ua haapao ratou i te mau parau a te Atua e i te tahi mau tau ua rave ratou i te mau ohipa ino, e ua na reira noa ratou e tae noa'tu i te tau no te arii o Korianetumera. I taua taime ra, ua hope te mau ohipaino ta ratou i rave, e no reira, ua tupu te hoé tamaí rahi roa. Ua pau roa ratou taatoa i roto i teie nei tamaí maori râ, o Korianetumera, e i muri rii aé i te reira ua pohe atoa oia i rotopu i te mau taata no Zarahemela.

Ua pan roa te ati Iareda e ua pohe atoa to ratou reó, oia hoi, te reó matamua, mai te huru ei ono hanere matahiti hou i te Mesia. Mai te mea te vai ra te reó matamua i te tahi atu nunaa éê, aita te mau buka moá a te Atua i faaite mai ia tatou i te reira.

Teie atoa, na roto i te aamu o te ati Iareda, (Etera i te Buka a Moromoua) ua ite tatou e, i te mau tau ta ratou i haapao i te mau faaueraa o te Atua ua faaorahia e ua haamaitahia ratou e te Atua, e i te mau tau ta ratou i haapao ore, ua tupu te mau peapea e i te hopea ua pohe ratou. E faariro tatou i teie aamu ei haapiiraa no tatou i teie nei anotan.

Na Viliamu

Iesu Te Mesia

Ua na ô maira o Napoleon a tapeahia'i oia i nia i te motu ra o St. Helena, "Ua ite au i te taata, e te parau atu nei au ia oe e ere Iesu te taata. Ua maere au i te mau mea atoa i roto ia'na ra. Ua rahi aé to'na varua i to'u, e to'na hinaaro e mana rahi ia ia'u." Ua faatia Napoleon, taua faehau rahi ia Iesu. Noa'tu to,na mana rahi i te faatereraa i te Hau, aita oia i tuu ia'na iho i nia'é ia Iesu te Mesia. Ua faatura oia ia Iesu i nia'é i te mau mea atoa o teie nei ao.

E farii anei tatou ia Iesu i roto i to'na tiaraa teitei? E pahono mai te pae rahi o te taata, e, e farii au ia'na i to'na tiaraa. Mai te mea te na reira nei tatou e haapao tatou i to'na hinaaro e faaiteraa ia'na e, te faatura nei tatou ia'na no to'na aroha mai. Ua ua ô maira Iesu e, "Teie hoi te ora mure ore, ia ite ratou ia oe i te Atua mau ra, e ia Iesu i te Mesia i ta oe i tonono mai."

Ta te taata e titau nei o te ora ia, ua tuu maira Iesu i te ravea e noaa mai te reira. To'na hinaaro o to te Atua Metua ia. A haapao tatou i te reira.

Te Mau Parau Api

Te faaite atu nei Te Heheuraa Api i te poheraa o Mapuhi a Mapuhi. Ua pohe oia i te 3 no Tenuare i te M. 1929.

Te ati no te hoe pahi auahi. Na roto mai i te hoe aua tuturaa pahi i te oire Niu Yoka ua tere atu te hoé pahi auahi o tei parauhia i te i'oa Vestris, ua haamatahia to'na tere i te fenua Amerika i te apatoa. No na matahiti i teie nei ua manuia noa te mau tere no taua pahi ra i ropu i na

fenua Amerika, oia hoi, Amerika i te apatoerau e Amerika i te apatoa. Mai te mau pahi atoa o tei tere i nia i te moana rahi ra, aita ona i ite i te huru no te mau mea ta,na e farerei i nia i to'na ra mau tereraa. E no reira i te 12 no Novema i te M. 1928 a tere atu ai oia i nia i te miti ua tere oia mai te mataú ore, ia tae râ oia i na maire e 200 i tua ua haamata oia i te feaa no te mea ua puai te miti i te taheraa i roto ia'na. Ua tuubhia te mau taata e rave i roto i te mau boti e te mau mataro, area râ no te vai-maoro-raa o te mau boti mai te ohipa ore aita i nehenehe ia tuubhia te hoé pae o ratou ra i raro, i reira ua haamata te hoé pae o te mau taata i te ouá noa i roto i té miti e au ai. No te rahiraa o te miti i tae i roto i te pahi ra ua painu te taihaa, e ua huri te pahi mai te afai i te mau taata o tei tapeahia roto i te mau boti i raro i te poheraa i roto i te miti. Ua pohe e 113 taata i roto i taua ati ra, e ua parauhia e, aita e â te ati mai te reira i tupu i nia i te moana mai te taime i tomo ai te Titanic i te matahiti 1914 mai te afai e 1,595 taata i roto i to ratou menema i roto i te moana ra.

Te Mau Hoa no te Heheuraa Api:

Ia ora na outou atoa i roto i te aroha faito ore o to tatou Fatu.

I te tahi po a haere atu ai maua Orovare na nia i te purumu rahi i Roto Miti nei, ua ite maua i te hoé fare niau i pihaiho i te fare teataraa, e ua faaroo-atoa-hia te hoé mau himeneraa Tahiti e te guitar e te mau haamanaóraa no Tahiti na. No reira, ua tapae maua i taua vahi ra mai te hinaaro i te ite i te tumu no te reira mau mea nehenehe. I reira to maua iteraa atu i te tahi mau hohoá iti i paraihia i nia iho i taua fare ra mai te faasteraa mai ia maua i te huru no te hohoá i roto; o te oaoaraa i to maua na au i te mau mata ta maua i ite i nia iho i taua mau hohoá ra, no te mea, te reira

te mau mata no te tahi mau taata ta maua i ite i Tahiti na; to maua mau hoa i te mau mataienaa no Tahiti e tae noa'tu hoi i te tahi no te pae Tuamotu.

Ua tupu i reira te hinaaro i te haere i roto i taua fare teataraa e ite i te hohoá mau. I to maua haereraa i roto ua faaroo mai maua i te aueauearaa no te taata oto e ua maere roa maua no te mea ua manaó maua e, e hohoà anaé teie ta maua i ite, area râ ua tuatihia te hoé parau niuniu i te reira hohoá e ite taime i parau atu ai te taata i roto i te hohoá i te reira taime iho â ua faaroohia to'na reó na roto i te parau niuniu. Tei reira i nia iho i te hohoá rahi te mau taata Tahiti i roto i te hoé fare i te aueauearaa no te taata pohe, e te reira atoa o Monte Blue e te mutoi no Papenoo e tae noa'tu hoi i te tiaa taata maóhi i te aueauearaa no te tamaiti pohe.

A tere ai te hohoá ua ite maua i te mau vahi mâtau ia maua i to maua faaearaa i Tahiti na e tae noa'tu hoi i te mau mata no to maua mau hoa i Tahiti. Aue te oaoa i roto i to maua aau i te iteraa i te reira mau mata, tupu atura te manaó ia hoí atu maua i Tahiti na e farerei ia outou i roto i te fenua hanahana e te nehenehe. Ua ite atoa maua i te pahi ra o Manureva, e te tahi atoa i roto i te reira hohoá, e ua faaroo atura i te harururaa i te are miti i nia iho i te ofai i Papenoo. Tei reira atoa te mau taata hopuhopu parau, e mea nehenehe hoi te reira ohipa i roto i te hohoá, e ua maere roa te mau taata tei ite i te reira i roto i te hohoá.

Eaha te huru no te mau taata nei i to ratou iteraa i te reira pae au e te mau ohipa i ravehia i reira. No reira mai te mea e ohipa maitai i ravehia e tere iho â te reira ohipa i roto i te mau pae au atoa, e ua tere atoa te roo maitai no Tahiti. No reira outou, eiaha feaa i roto i teie nei matahiti, a rave ra i te ohipa maitai ia parare mai te roo maitai i te mau pae ao atoa.

—Papaihia e Elita

Te na ô mai nei te parau faaite no te ati mataí i tupu i te mau pae apatoerau i te hitia o te râ e, "E toru ahuru pahi o tei atihia, ua tomo te hoé pae i te miti, ua parari te tahi pae, e ua haponu mai te tahi pae i te parau e, ua ati matou e te tomo nei. I roto i te fenua Baretani e hoé tauasini taata i vai'hohia, aita to ratou e fare. E ua taióhia e pae hanere i te tahi mau fenua o tei parau e, ua haamou-roa-hia to ratou mau fare parahiraa. Tana ati mataí nei o te ati mataí hau i te rahi o tei tupu i taua mau vahi ra no na matahiti e rave rahi.

E faaipoiporaa huru ê tei faaitehia mai, na roto i te mau vea. Ua faaipoipo atura te hoé vahine ruau, e pae ahuru to'na matahiti i te hoé tane api roa e piti ahuru ma hoé to,na matahiti. A anihia'i raua i te tumu no te faaipoiporaa mai te reira te huru e te mau taata papai parau no te mau vea, ua na ô maira raua e, aita maua i hinaaro ia faaite atu. Ua vai'hohia tatou ia feruri e, ei faaipoiporaa here anei te reira.

E faatupu anei tatou i te tumu raau mai teie te huru? I roto i te oire o Sanata Rosa i te tufaa fenua Tarafonia i Amerika, ua faatia te mau melo no te hoé Ekalesia i to ratou fare pureraa no roto mai i te hoé noa iho Tumua Raau Uteute. Te faito o taua fare nei e hoé hanere avae i te roa, e e ono ahuru avae i te aano, e te pare i faatia i nia iho e hoé hanere avae ia i te teitei. E ô e maha hanere taata i roto i te piha amuiraa e te vai atoa ra te hoé piha haapiiraa no te orometua. A faaoti ai ratou i to ratou fare pureraa ra, ua toea na iri tapoi fare e ono ahuru tauasini. Eiaha tatou e manaó e ua tupu taua raau ra i te hoé taima poto. Ua parauhia e, e na tauasini matahiti taua tumu raau i te tupuraa ra.

Alma G. Burton Imprimeur,
Rue Brea et de la rue Dumont d'Urville, Orovini, Papeete